

射
鷹
樓
詩
話

射鷹樓詩話卷十八

侯官林昌彝惠常輯

江左三家詩以吳梅村爲最錢虞山龔芝麓不逮也嶺南三家詩以屈翁山陳元孝爲最梁藥亭不逮也

藥亭樂府字琴句傲更不

足取

余性不能飲酒亦不喜飲酒然人之有酒德者亦未嘗厭之若側弁屢舞之態拇戰罵座之習則爲可厭甚或托他人之酒杯以銷我胸中礮塊更爲惡習梧溪翁頗善飲微醉時未嘗作大言驚世嘗聞鳩鳴作詩云朝聽提壺盧暮聽提壺盧提壺勸我酒不飲胡爲乎古來善飲者淵明與堯夫醉醒餘眞樂斯人聖者徒吁嗟阮劉輩禮法亦何疎覆舟非水罪荒惑非酒辜讀其詩可以知其有酒德矣

作詩貴情摯情摯則可以感人桐城戴蓉初孝廉

鈞衡

遊子

吟云遊子拜庭幃策馬就長路馬行不肯留遊子屢回顧
回顧淚沾衣但見白雲飛白雲飛滿樹是親望兒處天下
遊子但有遠志無有當歸者讀此詩不當淚下耶

桐城戴存莊孝廉著蓉洲初稿格調高逸音節宏亮余从栢
溪翁處讀其詩其詩辨香太白跌宕縱橫有昂頭天外之
概其詩五古勝於七古五絕勝於七絕蓉洲嘗論詩云古
大家作詩章法句法斷續離合變幻莫測而意緒歸宿確
有據依又處處有作詩之人在而初非牽強貼切粘皮帶
骨之謂要神味氣脈有獨得耳余謂存莊於詩每下筆往
往皆有作詩之人在故佳五言如秋望云天空雲氣台山
斷夕陽開送人之楚云風霜凋客鬢天地有孤舟春詞云

紫燕忽依水白雲長在天登鎮皖樓云東南雙眼盡吳楚
一樓高登月輪峯云崖崩欹怪石峽斷出飛泉訪石農云
野草碧連水溪雲白滿衣對月懷友云借君銀漢影照我
白雲扉晚泊梁山云魚龍吞水氣星月漾潮痕又帆利失
歸鳥山青連遠村晚春卽事寄友云鳩啼一村兩人釣半
溪煙湘州夜泊訪友云風聲常在水雲影不離山秋夕懷
友云斷雲依北斗殘月下西樓舟夜云江潮低樹影海月
小漁燈寄小亭云綠楊一夜雨紅豆兩人心過白沙嶺云
嶺灣斜抱日樹古臥生枝山中云雲深春樹暗路曲夕陽
稀晚步山中喜文一至云一樹落紅葉千峯生白雲訪隱
者不遇云松風醒鶴夢山雪冷梅花深山云山雄蹲似虎
石瘦立如人秋夜得童問琴書云月出乍疑水松高如挂

帆擬古塞上曲云沙氣迷紅日風聲捲黑雲送別張廣文
云城空秋氣早鴉散夕陽多寄內云殘煙迷古寺秋色上
高梧登和州鎮淮樓云吳楚一江劃乾坤千里分七言如
春興云山因向日消寒早春爲懷人覺夜長奉懷朱芥生
金壇云江濤激雪連天白沙氣乘雲壓地黃野望云日落
萬山凝紫氣風平千里定黃沙登呂祖閣懷友云大野陰
濃雲氣合高天風急海潮秋秋夕懷吳吉士云萬里月明
秋似水一樓風定露成霜金陵咏古云地劃長江南北限
山連鐵鎖古今橫舟發白下云雲吐青山城上出雁扶明
月海邊來張勗園云四海論交天下士百年如夢醉中過
寄劉艾堂云一樽風雨吟黃葉百里關山憶白頭白鶴峯
云古洞雲深藏怪石寒林木落見孤松又煙火萬家盤古

渡雲梯百折到危樓春夜云吹殘畫角更初轉夢到梅花
月正圓登秣陵城寄鍾甫云帆影夕陽紅樹外雁聲殘月
白門秋春日晚成云煙扶嵐氣青連屋雨長溪痕綠到門
訪客館書懷云野雲出岫不成雨明月窺人徑上樓山行
云飛瀑疑從天上落亂雲爭向馬頭來書感云明月到門
渾似水斷雲爲樹欲生風寄董思陶云萬里黃塵曾倚劍
一林紅葉憶銜杯乘石云吳楚雲山開萬里東南天地入
孤舟三元洞云鑿穴蒼崖棲佛鬼推窗白日走蛟龍和人
登岱云雲開梁父千峯列天入中原一掌收又雲挾風霆
驚地出天低星斗逼人寒

盛唐七古高者莫過於李杜兩家然太白妙處在舉重若輕
子美妙處在潛氣內轉此兩家不傳之秘慶忌之勇而要

離刺之豈在力乎滄海之深而尾閭納之豈在多乎察斯二者可以知李杜二家制勝之所在矣

奇外無奇更有奇一波纔動萬波隨只知詩到蘇黃盡滄海橫流卻是誰此元遺山論詩句也遺山意以蘇黃詩稍直少曲折故不及李杜故曰滄海橫流卻是誰李杜詩汪洋澎湃而沈鬱頓挫起題曲折故如滄海橫流蘇黃之不及李杜者以此遺山之所以不足蘇黃者以此此中神妙難與外人言也故遺山論詩又曰鴛鴦繡出從君看不把金針度與人

元遺山五七古詩有得漢魏盛唐人三昧者學詩者不可不參觀其集也

唐人王孟韋柳皆陶之一體而不能具體亦係其心體工夫

未從六經來耳卽王孟韋柳四家言之王第一韋次之柳
又次之孟爲下蓋王實兼賅羣妙韋之溫厚柳之雅淡皆
能胚胎古人孟詩特是清舉而已以其人品尙潔故能與
右丞齊名其詩究不免於窄狹非王韋柳之敵也今人視
四家爲平等焉得稱物之平乎

崑山顧先生亭林古近體詩沈着雄厚深得杜骨其詩可爲
前明詩家之後勁本朝詩家之開山余最喜其海上七律
四詩云日入空山海氣侵秋光千里自登臨十年天地干
戈老四海蒼生痛哭深水湧神山來白馬雲浮仙關見黃
金此中何處無人世祇恐難酬烈士心滿地關河一望哀
江天烽火照胥臺名王白馬江東去故國降旛海上來秦
望雲空陽鳥散冶山天遠朔風迴樓船見說軍容盛左次

猶虛授鉞才南營乍浦北南沙終古提封屬漢家萬里風

煙通日本一軍旗鼓向天涯

謂去夏誠國公劉孔昭也

樓船已奉征蠻

勅博望空乘泛海查愁絕王師看不到寒濤東起日西斜
長看白日下蕪城又見孤雲海上生感慨河山追失計艱
難戎馬發深情埋輪切鏃周千畝蔓草枯楊漢二京今日
大梁非舊國夷門愁殺老侯嬴四詩無限悲渾故獨超千
古直接老杜

卽菴詩藁四卷遊草二卷侯官曾惟闇先生

蘇垣

著先生爲

明南京御史諱熙丙孫蚤失怙恃長有書癖鍵戶獨坐左
右圖史焚香一爐供時花數種讀書其中謂人生行樂莫
大乎是性狷介於人不甚交接一時知名士多從之遊聞
節義事無論識與不識樂助成之唐王聿鍵開藩七閩以

丙戌六月行選舉典先生及弟祖訓同膺上薦會仙霞館
入海宇蕩平 朝廷定鼎之初 仁廟求賢孔亟閩中大
吏知先生學可用將徵之先生以體質羸弱絕意仕進乃
偕弟遜迹溯水遊大江南北諸勝自著曰江湖散民過佳
山水裏糧獨遊經日忘返暮或徑宿林谷下見者駭爲異
人所爲詩古文詞操筆立就不求工而無不工晚年著述
若干種惜都散佚僅存詩草及遊草十卷同里黃小石比
部詔芳題詩云風雅三百年君詩遍少谷忠愛抒性情憂
傷寓篇牘可謂切論五言古取源騷選及古樂府如豪竹
哀絲聞聲泣下五言律取法少陵骨力蒼勁其五言古惜
日云天地亦大哉古今相迫趣生世若微塵不勝一敝帚
人欲於此中相命曰不朽豈非危且誣而事乃常有如我

識古人在數千年後此數千年中以爲古人壽安知後千
年乃有爲我友肯爲一世人鳥兔隨飛走不爲一世人死
生莫能受大笑付蠅聲悲喜勞蟲口日月亦厭人心身不
相守霜月云空館月流霜夜色生微茫暗蛩潛入室眾鳥
苦林光一雁隨孤雲聲聲寒路長客意在高樓幽心獨南
望千山靜無影天水盤空蒼河漢不可測冷光浸衣裳卜
居云野老蝸牛舍漁翁梭子船各自不相換同寄一山川
鱖魚喜浮陽往往爲餌牽當其舐泥沙豈不願深淵人生
各有營閱途紛萬千苟欲宅其身豈不在聖賢世人尙眉
睫小喜快當前朝茵與蠅蚋分爭大小年因爲曠士憂辛
苦恐難傳多謝繁華子厚意似微憐鳧鶴不相續賤性靡
所遷不疑又何卜中情良謂然農歌云旱亦傷人心雨亦

傷人心饑亦傷人心飽亦傷人心前年荷戈走餘糧盡
斂半載空泥首一粒未入口舊歲歸故園故園但空村膏
田獲草根一旬了三餐今年病不死強力聊舉趾賣衣理
耒耜枵腹事耘耔薄刈足餽餽我已無兒孫舉匕未及吞
官吏行在門讓食受諍詈盡穫爲饋遺痛哭謂官吏民今
往死地登鼓山絕頂云策杖出雲背翹首天如戴突兀一
峯高峩然無後輩眉睫過山川羅列拱相待百里延清秋
洗刷歛異態澄江雙練明嶺表千峯黛城闌堦堦連此中
藏世界風海蕩心曾蒼白浮空碎平地齊飛鳥縱橫咫尺
內吾生憶所歷一一支掌在歎息謂此身梯米滄洲載得
季山顏燕書云閉戶方兩月君行已萬里春雪夢維陽秋
書寄梅水

甲午冬山顏別余云明春當遊維
陽歸期指秋又明年當復圖南也

忽落天外鴻

乃在長安市今秋及今春遠書三見抵素心歷山川清淚
溢寸紙亂離增遠聽憂余及生死時危慎風波爲余貧病
喜前書及余季朱陳結曾李雖屬戲笑言亦足見知己日
月易云邁別君兩年矣尺劍行中原所交幾人士顧念窮
海濱敝廬一曾子燕市屠狗散薊北秋風起屈指勞前期
知厭長安米中夜夢車聲杯酒明燈裏懷武原董紫帽云
側足登高臺日落笳聲起悲風從北來寒柯鳴不已其時
鴻雁驚羣呼如避矢傷我望遠心念我同門士委命在氣
非斯人提一是昔日哀江南血淚空盈紙麻鞋入閩關單
衣宿蘆葦八表一時昏天風飛海水孤身三只劍重齒六
千里許國止此身父母不得子十載已無家生人作鬼視
萬里招魂葬墓田生棘枳猶冀萬一存恐復無生理霾風

飛胡灰百城無堅壘君志在枕戈或碎睢陽齒不然守西
山却或蹈東海存亡不足論贏得頭顱在因惜苟余生甯
忍謂君死贈謝利鳴移居云破舟亦可居露車亦可賃次
夫不得意天地爲衾枕慷慨吾謝子貧惟四壁僅馬通塞
窮巷談笑移破甑廡下寄妻孥橫經就樹蔭有時沽斗酒
且招主人飲狂歌成五噫微霜點雙鬢穿壁夜讀書隔鄰
煙火屏蛟漏聽秋雨牛衣臥餘病客來語牀頭恢恢若游
刃曠眼寬宇宙一室懸孤磬五言律哀流民八首云春風
忽蕭瑟四野結愁煙幾郡連兵火無家任播遷離鄉逃鬼
路計日當生平滿目悲難盡何人不可憐忍言非赤子父
母竟無依隊逐朝煙起魂隨夜月歸草根充果腹木葉裹
鷄衣縱有監衣畫封書何處飛能來猶壯者菜色已如斯

聲出氣纔屬肌消骨不支遺殮誰有母易爨已無兒對此
餘黎痛尙堪念老羸千里傷心目煙銷薄暮天饑魂驚甲
馬弱肉怯烏鴛妻子眼中盡家山夢裏遷顛連重鹵地猶
阻渡江錢扶杖甯觀化纍纍載骨行吞聲悲野老蒙袂說
書生露宿鄰荒塚蓬飄逐亂萍更憐霑體苦風雨泣殘更
次第終溝壑哀哉匪子遺按圖如索驥延命似懸絲淚盡
枯魚泣聲傳鴻雁悲儒生空有恨天道忍無知吾郡頻憂
早春飢麥未成何方堪逐厲無地不輸兵戶減追逋稅農
亡廢近耕願茲流散者憔悴念餘生飢饉干戈裏困之疾
瘦成空村聞鬼哭通巷斷人行民已經三死天猶靳一生
驚心中夜起坐看積尸明七言律全吳友聖葉思菴先生
蔣馭六克平子子宏鄭子正諸子讌集湖上分得洞字云

東風吹浪錦帆開湖上賓朋盛賦才碧岸倒飛天際鳥晴
山低拂掌中杯魚翻細荇牽衣動柳暗行雲度曲回醉眼
峯頭懸落日六橋煙景且徘徊卽菴先生爲亦廬孝廉元
澄之六世祖孝廉出其遺稿屬題余賦七言古一篇歸之
並採其集中之尤者若干首入詩話俾世知空谷足音伊
人宛在也

惟聞先生詩得漢魏樂府之遺近體深得杜骨更有名句可
採者如斜月竹窺戶微燈風在窗解纜寒沙上行歌明月
歸野色來青嶂秋聲上綠蕪巖竹天然笑園禽自在啼獨
立天無際懷人秋自哀香乳分茶白新蒿覆石困鳥語閒
青草鐘聲定白雲夜蟲知客病怪鳥學人言一葉動微雨
數花聚小寒片雲藏古洞萬木洗秋山猿臂巖衣挂藤梢

石角穿泉聲高野碓雲氣沒葑田半江吞落日四野繪新
禾農語期中飯村歌識採茶間情增賦體多病禮醫玉雪
湧千峯白村炊數點青樵喧千澗雪漁臥一船鷗水拍柴
門動雲流石屋沈風霜棲短髮煙雨落長鏡樓當山缺處
客到酒香時詩積愁中債花經雨後貧衆鳥語三月孤煙
寒四鄰人煙寒略約溪雨長雲根暮雨臨江市春風小麥
村曉露啼衰柳寒林語落花秋日牆缺依山補畦疎帶月
鋤星稀明野曠夜久看天高水靜通花氣蟲言慙夜心燈
影勞蟲弔秋心到夢間遠鐘楓葉下孤雁漏聲還千峰一
室內獨客小樓前飲露資微月分蛩答暮愁山風吹野火
石鼠亂枯藤新衣憐白苧驟雨落黃梅天近星辰冷山多
河漢偏城頭過野色枕外接禽言閉戶修寒衲空山禮夜

鐘水氣昏於霧濤聲半在樓簷影樹開台牆陰山有無山
小依城迫人頑倚佛慈蟲聲一夜雨燈影半牀書短劍關
山滯孤城風雨愁茗火生微雨琴聲響衆山案巡飢鼠跡
門掩讀書聲小廊偏受月古瓦澹生煙小屋流雲影空梁
聚鳥聲雁聲醒酒夢楓葉足詩囊險句分山鬼騷魂采菊
英鳥聲生暖臘春色入寒山野雀依朝磬山雲宿晚鐘溼
薪噓冷竈寒木出疎煙待閨題新麻編詩入舊年鳥醒語
深樹雲間連斷煙白髮驚天地青山倦姓名月明千里客
砧冷萬家衣意亂言無次愁多天易陰山川雲外影詩句
橐中裝僻徑藏山路秋風掃石苔有恨花能老無心秋自
間岸淨蘆煙薄洲明鷺影翻亂雲眠石壁疎漏隱谿城山
氣昏微雨波光點夕陽冷猿啼暗壁寒雁落清霜谿楓飄

赤葉灘棹倚黃花曲岸回深竹懸崖出數家石擣千層浪
天低一片雲竹葦叢雲密人煙背岸疎潛魚窺鷺過細石
落沙虛霜葉迎寒裊青林出午雞飢鴉啼向客寒犬吠迎
人炊煙衝過鳥賽肉下飛鴉寒色帶洲綠斷煙生掩微野
水鳴寒碓虛舟聚暝煙畫舫煙中出笙歌雲外聽七言如
山空鳥語傳清吹寺靜溪聲咽亂松路驚積雪從天落人
傍疎鐘度嶺西仙窟雨珠雲際落龍湫瀑布雪中飛絕頂
風煙愁立馬百年邂逅幾登臺皆好句如仙

惟聞先生詩有極冲澹者如江村晚行送真乘上人入粵小
泊黃花灘高桐晚泊諸作司空圖所謂幽人空山過雨采
蘋可以擬其詩境其源實出浣花也江村晚行云人稀雞
犬靜雲暗下魚喧暮雨臨江市春風小麥村石田香菜甲

櫻屐滑泥痕數里鳴春急蕭蕭客到門送眞乘上人入粵
詩云以我不能往送君生別愁却來諸相現人去數峰留
貝葉流江水霜花點石頭應憐多難客春雨夢羅浮小泊
黃花灘詩云半日朔風厲舟行逆亂沙溪楓飄赤葉灘棹
倚黃花曲岸回深竹懸崖出數家徘徊過客地不碍夕陽
斜高桐晚泊詩云平溪行數里水緩覺山舒竹葦叢雲密
人煙背岸疎潛魚窺鷺過細石落沙虛向夕聞寒柝扁舟
傍草廬

吾輩不可結交官長蓋官場中所重者聲氣所尙者勢利眞
能愛才好士者實少其人不如得一二直諒多聞之友可
以進德脩業日常聞過以樂吾天俯仰無所愧怍陶淵明
詩結廬近人境而無塵世喧朱晦翁詩人自鬧時吾自靜

非有道者不能言亦非有道者不能行耳友人中有好結
當途聲氣者余不能學管甯華歆之割席爰書此以箴之
武進黃仲則綺懷詩玉鈎初放釵初墜第一銷魂是此聲傳
神之筆可爲綺懷詩絕唱前明王次回近代袁香亭喜作
香奩詩皆不能有此神妙然仲則生天情種以此促其天
年杜樊川薄倖之名亦才人之病也

儀祖茂才讀書有識曾無宿物笏下筆能達其衷之所蘊悲
天憫人情詞婉摯其五言古曉行書所見云殘雨曉猶滴
朝陽半吞吐四山春霧生一白更無路恰有趁墟人隔水
跨牛渡夜寒甚不能成寐枕上自嘅云屋漏晴不知夢醒
雪在面風燈無定光搖壁若閃電瑟縮擁敝裘粉蝶舞成
片黠鼠欺我眠放膽牀頭旋雙眼支五更一心歷萬變多

故睽絜歡無能坐少賤童牛去莫追姜被彌可戀五言律
聞逆回已竄入卡倫感賦云豺虎縱橫極將軍自建旄馬
嘶金塞遠鳥避玉門高白日揮戈急青天轉饒勞書生能
殺賊誰贈呂虔刀閉戶云間過清明節邀頭約爛尋夢多
通夜惡貧竟逐年深獨樹無春色歸雲有倦心鬢青還幾
日攬鏡自沉吟琴河舟次云一曲琴河水扁舟此暫停亂
鴉寒遶樹獨客夜觀星酒奪風威峭潮噴海氣腥不勞雞
唱曉雙眼自常醒送郊三籽燕之楚南云執手難爲別孤
篷正夕陽君行方嶺野我夢已瀟湘秋入庭闈早貧嫌道
路長依人良不易願早束歸裝侍家大人之練瀆歸舟得
岸容蘇野燒五字命足之云落日蒼然下孤城早閉關岸
容蘇野燒雲氣養春山雙槩一何急疎梅遠未攀卻教吟

髣髴上帶得暗香還題盧忠烈書七夕歇後云

時在一軍中一任饒

蠅集萋宏血自新死冤沈毅魄生祭有降臣七夕軍中燕

千秋傳裏身竟恢靈武業羨爾得梭人七律詠明史云淮

西王氣鬱嵯峨腰劍橫看十萬磨三代興王韋布少一時

名將故鄉多姑蘇賦重民何罪建業城高燕自過堪笑六

朝殘局短有人醜酒看山河一朝恩遇讓開平竟脫胡藍

黨裏名好句花陰吟學士內宮蔬食說先生陰謀不問元

臣藥積慮難消孽子兵誰道興王多忌刻漢家祇是戮韓

彭黑風驚起浴龍池無恙南巡鐵騎馳一代君臣耽酒色

十年鷹犬沐恩私揚州好女搜應盡地下高皇悔已遲開

國規模深誤汝浣衣局與教坊司煌煌禪詔說皇兄論禮

如何舍本生千古歐陽留至論一堂洛蜀太紛爭立藩漫

援青宮例傳弟如尋金牘盟不是宋人持議謬獻夫此語
最分明湖山氣數已難支天語微聞禮醮時連歲楚秦崩
似瓦一朝宰相亂如棋閣臣但主遷都議戚里猶營殖貨
私矯首煤山烽火急傷心獨有侍臣知彰義門高敞似雷
鳴鐘無復百官來愛民敢說非英主亡國何須定不才四
海毒由征斂積累朝禍自黨人開此行殊被黃巾笑血戰
連營祇幾回一曲春燈半壁留衰朝殘局恃揚州內廷筆
札才人敕復社文章狎客仇嗣統偏逢陳後主論兵敢薄
武鄉侯普天爭灑龍髯淚豪鎮空聞擁戟矛擁戴何關馬
阮勳恩牛怨李太紛紜御廚狗熟君含笑天墜兵來相不
聞江上風濤黃闔子傳中功過左將軍孝陵王氣匆匆盡
一舸蕪湖載舞裙岳忠武云獄起風波敵亦驚中原甘自

壞長城固知南渡難爲國肯戀西湖竟罷兵天道終嫌金
匱約相公早應玉芝生忠魂轉眼悲陵谷一樹冬青杜宇
聲韓蘄王云天風高颺賜旂明桴鼓金山幾戮鯨豪傑志
灰三字獄朝廷心厭兩河兵胡塵不見鑿輿返相業方從
歲幣爭尙有趙家乾淨土西湖白髮寄餘生子文以松雪
翁所寫信國公遺像見示感賦云如意西臺一哭休橫江
白雁不成秋披圖弈弈神猶王曠世茫茫我獨愁丞相出
師空爲漢王孫抱器竟歸周蓮花莊上鷗波好風雨匡山
痛覆舟錢武肅云終古江聲滾夕陽表忠有觀已繁霜百
年版籍徒輸宋一代英雄不伐梁圓木枕欹金彈落淩煙
閣起畫衣涼他生終爲靈湖賣半壁湖山了靖康韓胄云
臙有頭顱退敵烽平生相業太庸庸諸軍北伐愁鋒鏑大

禁中朝論鼓鐘別墅晝閒聞吠犬永州人遠夢乘龍撰著
門下誰占遯枉草除奸疏一封鼉錯云七國兵來失智囊
朝衣東市太倉黃集蠅口利纔終入投鼠心雄器易妨政
體每傷持太急宗支誰信弱非祥後來更有傷心事燕啄
皇孫入建康有以金谷園詩見示者次韻和之云茫茫梓
澤弔遺邱訪豔難尋舊畫樓亂世有財原不幸故交無賴
忽相仇美人絕命啼紅淚名士同歸慰白頭輪與范丹貧
自樂象焚麝敗到今愁文信國云削籬弱盡中原勢積弊
誰能抗疏攻冠代狀元留未運捲堂聲伎出英雄三年土
室孤臣淚一嶺梅花異代忠史闕部爲公後
身見明史稿痛惜王孫偏
愛死朝周玉馬去匆匆湯太夫人斷釵圖爲雨生都督題
云重緝遺句暗吞聲精衛難填恨海平一物流連天地老

全家轉徙死生輕將軍海上曾傳箭名父滇南舊結營三
十九年成短髯勞他釵股記分明白首相相依患難偕一朝
玉折憤填懷兩家勲烈磨崖記百戰聲名斷鏃埋投筆兒
誇班定遠靴刀人哭李臨淮可堪久抱摩笄痛重爲思親
賦斷釵呂城舟次病體稍舒慨然有作云百年多病況秋
風三疊霓裳涕淚中江左任誇名士鮒天南猶巨美人虹
攻心此日無諸葛刮目當時有阿蒙不信荒城還姓呂夕
陽雙槩過匆匆漫興云一領青衫不救貧寂寥天地況風
塵拊牀偏有聞雞客陟坂曾無叱馭人蕉夢迷離防是幻
梅花消息怕全真防秋誰撤重洋戍曲突空聞議徙薪葦
蘇州祠下作云祠在郡學中荒林鴉點夕陽暉手整殘衫拜左
司占夢有人聊說禮相傳公歿爲夢神此殆因周禮有夢人之設遂附會之也登堂非

我莫言詩此間俎豆譚何易當日流亡政可知

邑有流亡愧俸錢公

在任時一樣好官香火在畫船只訪白公祠近況云病榻

支離匝月寬玉梅窗外正奇寒夢回殘句呼兒記別後新

書當友看

昨得耕孫楚南信

營炭無貨閒午竈

力營新炭備春寒本放翁句也看

花有約負辛盤

辛田丈相約看梅

入春祇是多風雨難得巡檐鵲

語乾

濟陽張稷若

爾岐

蒿菴閒話引邢延慶云居官者每留心事

上而不知恤下居家者多留心恤下而不知事上真顛倒

相可謂至言亡友林松門

振瀾

詩云事親能如事長官不

愧人間真孝子與邢君所論同一見地

婁縣姚春木布衣

椿

箸通藝閣詩錄八卷魏默深司馬出其

集示余布衣博聞廣志思將大有用於世遊京都不遇退

而著書以自娛其詩出入唐宋諸大家而律詩取法在杜
子美蓋其近體勝於古體也布衣負必欲行之學久藏於
心志發而爲詩其情正其植厚故怨而彌婉質而彌華五
言古鳳嶺苦寒云誰云青天高氣與厚地結嚴威厲終古
慘象迫短節入三五里雲踏千萬峯雪人兼歸馬噤路共
飛鳥絕孤光導眸明羣凍入足裂顛頊久專柄羲和若迴
轍秦關此尤險簫鳳去已瞥因思燕山寒愈念蜀都切劔
兔燐莫溫呼酒暖不熱俯規殘澌皎仰見衆星列獨眠宵
未闌浩歌興彌烈訪方響洞云沈泉自穴出仄勢碎珠迸
謀耳水樂諧徹底乳泓淨微風動深蒼急雨驟寒徑夜來
環佩搖秋冷松竹暝何年蕤賓鐵妙與宮商應小樓夢未
殘孤館酒初醒霜淒四圍逼月出一方定戛戛想悲吟冷

冷發幽聽琅然出梵放亂以一聲磬慨彼題詩人虛泉入
清與牛口云潛淵拔深蛟起挾亂石走疾風掉尾去留此
與水鬪巉巖憑餘威奪路絕奔湊舟行緣而升若以口承
雷濤頭倏噴涌漩極不敢逗一朝後出灘名出泉險右眼
困用耳濟足踣手將救縱有萬夫力不敵一放溜夜聽洶
波聲雷霆出衣袖滴水巖云行人樹頭出潛水地下經旣
分西南流遂別沮洳形夜靜發虛籟曉窺浴明星喧寂各
有會遠近皆可聽未能臥洗耳劣可淺沒蹉乳竇合晴雨
袋徑滙杳冥忽聽飛瀑響劃破層厓青寬川鋪云遙遙炊
煙高厯厯樹影亂湯湯清流激浩浩白石粲天開晴光多
馬喜足力健人於登頓久軒豁得平行沃野成都饒山郵
漢中半兩峰各千里中置此驛便幾載蜀師屯行行前指

西雞頭關云曉行不知遙暝色歷諸嶺如聞流水中忽已
升絕頂心知險峻絕強睡項伏領輿夫勉其勞反以昏黑
幸閉置誠何堪乘危意自省七盤復七盤遠見東旭影送
客云離筵不能別宛轉江頭送燈動暗潮來帆低寒雨重
何時一尊酒復此千里共臨水詠將歸空教隔秋夢鸚鵡
洲弔禰處士云鳳鳴必方壺鸞栖必樊桐才人處亂世兀
臬難爲容漢未有禰生提絜修與融生平抑憤氣淵淵鼓
聲中時雖忌其狂後亦欽其風東京諸名士幾困奸人雄
鸚鵡一能言明哲累爾躬所以郭有道首尾如潛龍七言
古極樂寺看荷云疎疎紅紅靜白白世界清涼藏古色夜
深風露送香來秋夢江南歸不得波明史弄空外影雨過
方知定中力古來何語品花工文殊不語維摩默三峽歌

云峽中之水發岷山西荒冥冥冰石間雪山一夜春化水
排突萬丈成驚弦成都千里古天府縱橫下貫東西川亂
流合巨重迴漩束以高峽參穹天夷陵西夔州東浩浩萬
里來長風峰彎路曲蓄水勢不爾一瀉天無功羲娥高輪
疾驅過終古不許開陰濛猿啼虎嘯杜鵑泣惆悵楚女愁
巴童逐臣遷客過此而悵望冤語夜半浮波中三峽歌
歌正悲蛟黿翱翔侑游子夜臥白盡千莖髭五言律歲暮雜
詠十首云盛世崇寬大哀黎望拊循戈鋌消四海租稅算
千緡渤海徵龔遂河東借寇恂西山羣盜賊當日本王民
談笑思安石何人鎖上游野屯增竈急屋臥徒薪憂鵲語
三巴夜猿啼八陣秋漏天連日雨淚灑古梁州百戰能談
虎三邊舊射雕漢廷知李廣絕域附班超雲氣連天暗星

芒徽夜銷將軍一去後大樹日蕭蕭久設三秋戍長屯萬
馬營偏裨皆坐甲大將不聞聲超距軍中戲投壺閩外情
虛聞伏波語裏革是平生此豈從容日羞言一將才披圖
朝點筆得句夜銜杯列障傳烽遠寒江走馬哀書生籌國
恨青髻欲成灰亦有盧從史專張大帥威材官皆欲殺幕
客總思歸膏刃嗟黃籍投戈爲白衣坑降千古戒何況此
曹非國有三年蓄兵皆六郡豪微聞諸郡邑不守舊城壕
節度馳輕騎將軍顧寶刀縱邀寬大詔莫更挺身逃隴
頭悲壯士慷慨誓捐軀家散千金盡身提一劍孤報讎紛
涕淚祭墓擲頭顱兵氣揚如此艱難媿作儒一隊桃花馬
翻身袴褶紅聖姑神吐火小妹健彎弓金帛歸諸將鬢眉
負乃公秦家無白桿誰與鬪英雄聖朝願教孝臣子意如

何事爲從金革詩皆廢蓼莪衣留慈母線身荷候人戈太
息叩棘阪揚揚叱馭過不寐云不寐支殘枕涼風水自波
夜蛩砧語急秋雁鴈聲多逐客材槁櫟騷人詠薜蘿古來
寥落意容易託勞歌曲突云曲突今嗟晚推枰故未遲但
能堅壁壘不在變旌旗列劫銷兵氣台垣拱鼎司捷書清
晝報望斷暮秋時雨中過張丈賈銘寓齋出示雨夜獨酌
見懷作次韻云天一壓溼雲沈蟲聲忽到林催詩銅鉢擊聚
墨玉壺斟今雨扁舟約秋風萬馬心南音操自慣越客尙
吳吟七言律秋雁云誰信桑乾水驛賒蒼茫澤國渺蒹葭
衡陽南去渾無路碣石東歸尙有家二月濃陰留燕子一
生短夢託蘆花晴灘穩臥閒鷗鷺何處天隅萬里沙夏內
史玉樊堂集云垂絕孤兒尙枕戈尺書千里走鯨波國殤

義早辭薇蕨家祭詩真廢蓼我終賈年華心事冷機雲詞
賦淚痕多梁朝開府頭垂白纒向江南弔綺羅全吉士鮎
埼亭集云甬東亭址久摧殘誰問歸田七品官門戶盛時
儒行貴是非真後史才難南雷學在留心續東館人多袖
手看自是此身文獻寄不將名位救饑寒衛藏書事二首
云鳩摩名字卜金甌天雨刀兵劫未休太古有冰山不化
飛沙成海水西流箭從漢代理應久柳比唐年舞更愁青
海將軍傳令速與君談笑說封侯經馱白馬昔來東絕徼
羸牛遠更通頻見使星占李邵又看枸醬走唐蒙藏江一
夜皮船渡雪嶺千年鳥道空可惜文園封禪筆西南邊事
太忽忽于忠肅公墓云重臣談笑靖湖沙籌筆中書鬢未
華南內星明龍復闕西湖月冷鶴歸家後人發冊心尤盛苦

世轍弓事可嗟太息兩峰相對立三台秋色映棲霞重過
靈隱天竺道中云笑整先生烏角巾相逢來往誤仙真峰
藏曲影渾無路泉滴殘聲若有人芳草綠回前日徑桃花
紅到別家春須知雞犬移家易便擬相從作比鄰悲唱云
鰥鰥鯨奔轉餉難輕齋容易出驚湍已聞海上誅楊僕浪
說軍中比曲端盜賊由來勤買犢偏裨何日望登壇吳兒
悲唱誰能聽風雨蕭颼月色寒登潮音閣用宋張子野泛
松江韻云可緣游倦始思鱸直爲風光憶故吳身似晚雲
歸洞壑夢和秋雁落菰蘆翻思江水來巴蜀直走金焦望
小孤無限天涯奇景在眼前髣髴是斯湖鸚鵡洲晚眺云
東漢風流剩酒狂平川無限恨茫茫客中倦眼憐芳草江
上愁心易夕陽已笑曹劉虛戰伐久嗟屈賈誤文章何人

會得悲歌意吹笛空江爾許長客中除夕云僕夫解轡馬
停駢我亦征塵倦拂衣萬事無成閒處老一年將盡夢中
歸成都春酒愁添暈劍外江山舊合圍猶勝曩時戎馬客
滿天風雪望庭闈七截題甘亭詩後云詩參唐宋諸家體
文是孫洪一輩賢眼送此才憔悴老秋衫顏色冷於煙感
旗亭事題壁云蘆花如雪舞空遲畫壁旗亭又一時太息
龍標王少尉夜郎西去更吟詩五言句如河冰能躍馬風
石欲飛人馬蹄驕日影人語答谿聲鳥掠行人過猿欺獨
客還今雨扁舟約秋風萬馬心客去門常冷人非佛亦孤
七言句如十載交情惟爾獨萬山春色共人歸萬馬曉驅
漳水渡亂山橫截太行來

男慶焯辭

射鷹樓詩話卷十九

侯官林昌彝惠常輯

澹靜齋詩鈔六卷閩縣龔海峯先生

景瀚

著先生全集爲昌

彝校定文集八卷柳風說三卷祭儀攷四卷說禊二卷離

騷箋四卷循化廳志稿八卷悉先生所手定其屬稿而未

成書者孔志補拾攷讀書錄共若干卷皆說經之圭臬也

先生幼讀書日誦數千言乾隆三十六年成進士罷歸教

授閩里十有四年研究經史時務凡古今因革必窮源竟

委求所以通變官民之道及捧檄三秦百廢具舉政聲洋

溢民愛之如母論者以爲尹翁歸之治東野黃霸之治潁

川當不是過嘉慶元年楚匪蠢動總戎命先生參軍事時

督府兼四川軍事復奉命總統三省幕府文書及四省軍

情皆屬先生擢蘭州知府先生畫省戎機夕治軍書夜綴
奏草幾於百函並發從軍五載馬首東西而未嘗一安寢
雖足瘍頂踵猶力疾據案治事文集多軍旅之作撫議平
賊議堅壁清野議諸篇率皆洞達治體曉暢方略堅壁清
野議大旨云爲今之計必行堅壁清野之議責成地方官
巡行鄉邑曉諭居民團練壯丁建立堡砦使百姓自相保
聚併小村入大村移平處就險處深溝高壘積穀繕兵移
百姓所有積聚實於其中賊未至則力農貿易各安其生
賊既至則閉柵登陴相與爲守民有所恃而無恐自不至
於逃亡別選精銳之兵二三千以牽制賊勢不與爭鋒但
尾其後賊攻則救賊退則追使之進不得戰退無所食不
過旬餘非潰則死此不戰而屈人策之上者也既而大府

以其法行於蜀及漢中卒用平論者以先生經世之學

幾之明老謀壯志上與 廟算符契非凡賢能所及也嘉

慶七年冬入覲 仁廟溫諭垂詢軍事甚悉未幾疾終京

邸悲哉閩縣薩檀河 玉衡 輓先生詩云漢朝良吏卽功臣

幕府徵書仗一身博得千金爭寫范恨無七寶例平陳今

之管樂誰流亞事到艱難惜此人洒向西風數行淚可憐

父老望三秦讀此詩可以知先生之所繇抱矣先生負命

世才經濟似謝幼度而卓識勝之文章似杜樊川而實用

過之其器量宏遠則又卓茂劉寬之儔也而卒未大用此

非吾道不章乃閩人之不幸也先生旣受 仁廟之知若

天假以年則其豐功偉業何必不在韓范富歐之間哉先

生論詩以性情意味爲本有體格而無性情有韻致而無

意味者先生所不取也先生詩以陸渭南之性情具蘇長公之風力其爲詩不事矯揉雕飾性真激發衝口成章諸體畢備蓋其敦行好修學純守正故發之於詩者露乎孝子悌弟義夫順婦之容倜倜乎忠臣信友之概此其深於性情之事而非徒以素絲黃絹較其工拙者也先生嘗有詩曰天下文章在五倫夫五倫之事何一不由性情然則欲求先生之爲人而得先生之所學爲何事則可以言詩矣其秋日錄近作自題其後云少薄詩人近學吟言中懊惱意中深長篇短律都無賴萬轉千回只此心霜葉何曾怨秋氣寒蟲不覺有哀音幾時待得東風至花滿春山鶯滿林

元人虞揚范揭四家詩皆有唐音虞詩深得山水之趣意境

幽渺尤爲四家之最

漳浦黃忠端公父青原公祖墳被土人侵佔一夕雷電大作墳前後左右苔字大書黃界二字遍墳皆是此石齋先生

忠孝之英靈所感也余與亡友子萊黃石齋先生祖墳苔

字歌聯句云荒烟蔓草天霏霏霏霏銅山萬古存孤岑子萊先

賢忠孝死不朽英光長照閩江潯漳浦黃家舊名冑霏霏勝

朝累葉垂纓簪石齋尙書負神異子萊挺生夢感龍精姪歷

心文字搜邱索洞機名理尤浸淫先生常著登高四望暝

雲合先人墳墓當岷嶽君子之澤已五世何物狐鼠生氛

祲鋤強太守不復出拔薤安得來龐參帝遣元精作飛檄

羣靈千隊行駸駸霏霏墓旁居人盡鍵戶謠言毅魄從天臨

萊子萊荒塋一夕長苔鮮黃山黃界鋒芒森天然意造豈人力

蘇橫掃墓側連碑陰前朝陵寢亦榛莽杜鵑啼血悲秋霖

萊子鄴山北面望宮闕遙遙不見松楸林孤忠萬劫念君父

上天久鑒公之心黃泥宜有鬼神護流示奕禩光來今闕

鄉風雨出堆塚六安陂岸留公琴蘇古來哲人存聖蹟我

時憑弔還霑襟矧此海濱毓賢地白楊不翦今蕭慘子秋

聲颯颯吹片紙墳樹爲我俱悲吟蘇

閩縣薩檀河先生宰洵陽時劇賊方薄城大攻放火凡七晝

夜符節相望咫尺不一矢援先生誓口城卒詩云黑雲壓

城黑風吼疾雷破山墮天狗金烏日光翻火雞火城墨拒

愁雲梯諸侯咫尺不遺矢白羽一麾削者起嚼弩賁鎧休

問糧城存與存亡與亡

高要蘇德輔侍御廷魁箸守柔齋詩鈔三卷粵東羅某生通

政悖行以示余侍御詩如幽葩奇石移情動魄名章迴句
處處閒起麗典新聲絡繹腕下五言古如八里排遇風云
頑雲互南北寒吹失昏曉大聲江上來投林落飛鳥羣山
莽搖動萬象入喧擾人憐凍蠅癡舟似春楊裊遠遊險已
習虛警心轉小煥室猶履冰深居亦集蓼各有徇務苦自
嫌達生矯安得乘日車縱觀楚天杳瀧中作云九瀧界楚
粵厯險駭初見舟徑山腹行水引坤軸轉亂石聚魚鼈奔
湍挾雷電景幽魍魎窺光驟神靈旋慄然動毛髮恍閱西
方變崖壁少岐途來往爭一綫不容千斤載遽苦十夫牽
失勢驚跼鳶翻身掠輕燕三朝三暮上一上一回戰伏波
念少游昌黎懷廣殿浮名累壯志鉅觀失遐眷腸回路復
紆叢筍雜飛霞七言古如主人爲作西洋筵卽席有贈云

珠毬紛挂星垂芒百花環坐條風香玻璃盛酒琥珀光銀
父銅鼎燒羶羊麪雞糕破塊嘗妖童妙舞艷觥張畫鼓
一聲進一觴主人稱壽樂未央鳴鐘番奴奏宮商應時拍
翅金雀翔杯停點茗分旗槍此閒賺得春宵長東鄰翁媪
壓糟糠白首不識膏與梁壯士擊案歌慨慷盛年沈醉留
他鄉觀湘閣聽曲和蔡孝廉顯原云錦灣漁火青濛濛市
聲卷夜烏啼風臨江高閣奏弦管清音飛入琵琶峰桂郎
嬌小倚明燭丰姿秀奪瀟湘綠騷魂蘭佩夢留香仙隊霓
裳親授曲野蠶作繭絲纏綿未卽登場已可憐春情消得
寒天雪旅思深添遠浦煙煙雪霏微度鴻影參旗光射星
沙境長笛初停漏鼓催孤舟此別征途永識曲中郎意奈
向他鄉萍水漫高歌十年重問金門柳南國佳人感慨多

五言律如古陽樓用杜韻云子美題詩後東南重此樓我
來春雪霽身與碧雲浮湖勢無全楚帆聲有萬舟憑欄一
長嘯今古接風流七言律如六月十五夜翫月云江月無
端墮客前葛衫蒲扇與周旋搖搖樓觀潮來處澹澹星辰
雨後天照向中閨先夢到看從今夜待秋圓梧桐百尺棲
孤鶴遮莫吟聲攪爾眠旅懷寄區靜齋慕濂云采菊紉蘭
節暗過客懷爭得不蹉跎牀頭金與秋花盡囊裏詩同落
葉多勤苦易成思稼穡登臨無和憶羊何江城小閣經年
別誰溯漚川聽棹歌題黎二樵集後云賸有才名海內傳
清時窮老赤明天嘔心恐落三唐後放手能爭五子先兒
女悲歡成絕調丹青邱壑送殘年於今市井爭珍璧在日
尋常負酒錢答友人云閨闈秋聲入短吟儒冠憔悴歲華

侵重泉兒女他鄉夢一往風霜寸草心天地自閑人事迫
文章誰健我憂深古來王謝知哀樂絲竹平生不解音題
吳梅邨詩集云復社名高海內歸一錢不直素心非生憐
令伯陳烏鳥老羨維楨得白衣法曲淒涼遺史在制詞推
激昔人稀江東獨步才原少肯放西山詠采薇長沙旅懷
云枯樹霜明點點鴉楚天寥碧望長沙南船風掠昭潭出
西郭雲開嶽麓斜太傅文章憂漢室藩王池苑問誰家熊
湘閣上登臨客今古蒼茫入鬢華楊校錄維屏同寓玉極
庵出燕臺鴻爪集索題云南風手妙響朱絃目送飛鴻興
渺然燕市交遊論古調秋心搖落待誰傳旗亭小史霏霏
玉佛院昏鴉點點煙一樣悶愁人海闊無端拚集鬢絲邊
登黃鵠樓云一聲長笛倚斜暉樓上江風振客衣多少神

仙名不著白雲黃鶴任天飛趙北口云趙北燕南畫本開
平沙細草水雲堆十三橋柳藏春色青向行人馬首來

絳跼草堂詩鈔六卷閩縣陳恭甫先生箸先生經學精博有
左海經辨五經異義疏證尙書大傳定本洪範五行傳定
本三家詩攷證東越儒林文苑傳左海文集左海乙集駢
體文行世先生詩蒼雄逸秀溯源浣花五古雅近建安七
古合高岑王李爲一手橫厲處復近韓蘇近體則淹有明
空同莽州及國朝梅邨竹垞之勝建甯張亨甫評先生
詩云五古溯源浣花委注梅邨七古杜岑氣骨韓蘇才情
遠揖北地近俯秀水五七古近體則李何王李王施朱宋
無不撮其精華尤於莽州梅邨爲近七絕亦風調清遠在
國初諸老之間先生五言古如過楓嶺漂母祠美人題

王上泰荷新圖讀樊川文集又讀樊川集遊子吟題鄭六
亭解元南歸舊圖觀音巖駟賦篇爲從外祖姑王郭氏作
小西湖泛舟自警廬陵王孝子詩等篇七言古如放歌行
雁門行萬安橋青山靈王廟全使君木蘭扈 蹕圖王明
府海運圖南靖寓齋敞荔疊韻海天風雪圖文信國琴歌
何編修觀海日圖容成丹井嶺行憶梅蕭山汪氏雙節母
詩暮秋出廣渠門送同年謝甸男南歸禮烈親王克勒馬
歌讀黃石齋先生自書謁周中丞祠詩仙人掌石歌贈梅用
東坡先生松風亭韻白雲謠扁舟黃葉圖卿雲萬態石歌
李陽冰般若臺篆歌翰墨香秋山行旅圖竹莊歸釣圖等
篇皆傳作也五七言律迫近盛唐春雨云簾外鶴梳翎絲
絲春雨冥濕煙低水白疎葉滴檐青風色侵虛幌山光罨

畫屏數聲歌嘯合遙答護花鈴冬日云朔氣深山郭霜晨
霽色殊滄波翻白日野燒蕩青蕪海濶魚龍眠大寒雁鷺
孤可憐窮島外飢卒荷戈芟黃田早行云羈枕何曾睡灘
聲一夜流霜消茅店曙雨洗桂巖秋驛樹明津岸沙禽下
柁樓平生惜風景未倦長卿遊延平旅宿云明翠樓頭月
高城伏枕初社燈春鼓急邨火夜春疎風物連千里鄉心
繫尺書誰能倚長劔更宿斗牛墟沈秀才看雲圖云之子
雪灘客門前湖水流濤聲不受雨雲氣半崩樓深谷起何
處碧空無盡秋捲簾閒對酒明月又滄洲出塞曲云草淺
月蕭蕭行沙萬馬驕劔冰青海裂旌雪白山搖征戍愁驅
雁兒童慣射鵬莫令麟閣畫祇數漢嫖姚河間道中大風
雨云狂飈蕩平野燕趙失青蒼雲壤壓天黑沙鷺驅雨黃

神靈定何意咫尺相羊萬里王程急昏鴉又一鄉夜
赴彭城云馬首接明月蒼茫何處邨荒山爭亂石微徑走
中原天劃青徐小雲歸梁楚昏時平桴鼓急煙火見彭門
東林寺云下馬綠楊外鐘聲落野亭雲來九江白山入六
朝青蓮界誰開社松枝罷講經唯畱虎溪水攪夢到禪局
衛輝簡王儕嶠太守云古柳朝歌道高城落日斜秋禾紅
上犢野菜綠翻鴉淳俗安同井仙才簡放衙向來經國事
未肯付詩家平定臺灣恭紀六首云紫宸前殿下霓旌橫
海戈船破浪輕窮島虛徧虛盜弄中朝韓說遠專征欲除
害馬安司牧豈爲封鯢樂用兵 聖主軒弧原在握坐看
萬里陣雲平貔貅十萬競搖鞭飲馬鯤身七島前金鼓已
聞扶杖拜鉄衣何待枕戈眠石門削翠驅妖鳥玉案摩青

隨跼鳶壯士不愁銀漢挽天教飛雨洗兵還捷報甘泉埃
火微三軍歌舞捲紅旂桐城夜靜潮雞合竹塹春遲戰鷄
歸笳鼓中流隨使節風霜絕微憶征衣金闈昨夕刀環月
草綠西園蝶未飛門通羅漢碧天高夾道飛花拂綵旄
騎歸珠勒馬龍驤浮渡玉環刀榕陰極戍嚴鐘鼓梅雨芳
田靜桔槔震屢懷柔兼遠略萬方親見 聖躬勞聞道婆
洋萬里途鯁人鮫妾百蠻趨大荒枕海迴天地絕域占星
控越吳日月高擎三島樹風雷長護六壬符 神京聲教
無遐邇甯數蕭家職貢圖風帶春濤入短簫衣冠飲至
未央朝裴公勲伐宵碑壯鄂國丹青羽箭驕貔虎禁中皆
脫劔龜鼉海外已成橋漢廷空下珠厓議誰見搏桑銅柱
標浦城道上云寒城花霧曉冥冥十里晴郊倚短亭南浦

波如前度綠東風草已夜來青天邊鳥影看無盡客底詩
魂覺有靈獨憶船場門上月家山回望白雲停宿漁梁山
次前韻云巖壑清暉變晦冥邨墟茅店尙亭亭寒煙幾樹
無情碧背日千峯不斷青驛埃往時思將帥洞天何路訪

仙靈行歌卻上高臺望樵徑蕭蕭獨鳥停

宋韓世忠擒苗劉於漁梁驛漁

梁山三十六洞天之一也

和謝句男無題二首依韻云劒外塵沙落日

昏珠鈴幃幄莫輕論彝陵羣盜窺秦塞夔府孤城阻益門
豈少蜺旌專外間仍煩虎旅出中原可憐一片關山月夜
夜霜刀照血痕甘載飄零劒氣昏青尊細雨夜深論詞人
自撰元和頌兵法誰通太乙門阨塞山川問戶佼激耳肝
膽託平原虯才媿擲封侯筆潦倒青衫有酒痕宿正定隆
興寺云傍城古柳澹無煙紺宇飛樓俯大千秋色來青滿

恆岱河流捲雪走幽燕劫餘文字供過客有隋開皇六年碑記夢裡
莊嚴詫宿緣余少時夢空中現兩巨佛露半身寶相莊嚴
寺大佛高七十三尺恍如所夢異哉笑我本無桑下戀花宮風月住何天此
蘿月亭四大字明呂一奏草書勒石壁

坡翁赤壁賦西望夏口東望武昌昔人已辨其誤曹孟德鏖
兵之地非坡翁賦所謂赤壁也然坡翁文集書與范子豐
云黃州少西山麓斗入江中石室如舟傳云曹公敗所謂
赤壁或曰非也時曹公敗歸華容路多泥濘使老弱先行
踐之而過曰劉備智過人而見事遲容夾道皆葭葦使縱
火則吾無遺類矣使赤壁少西對岸卽華容鎮庶幾是也
然岳州復有華容縣竟不知孰是據此書是坡翁明不知
赤壁所在也濟陽張稷若引張公如命云東坡文字亦有

信筆亂寫處如前赤壁賦壬戌之秋七月既望下云少焉
月出於東山之上徘徊斗牛之間七月日在鶉尾望時日
月相對月當在甌訾斗牛二宿在星紀相去甚遠何緣徘
徊其間坡公于象緯未嘗留心臨文乘快不復深考耳侯
官吳少山茂才文海詩云壯色江山蘇子賦只嫌赤壁攷
非眞斯言得之

養一齋詩話云丁儉卿考證宏富偶以秋谷聲調譜平仄之
一定者爲疑作書以答之曰按譜中所註古詩字音平仄
一定者如于鵠年年山下人句趙氏注曰下句是律上句
第五字必平愚按不獨平韻五古卽仄韻五古亦然如襄
陽天邊樹若薺江畔洲如月薺字必用仄聲者以下句是
律也蓋不如此恐與律詩混耳此無可疑者也靜聞水滸

淙句趙氏注閏字曰此字不平則爲律蓋亦恐與律詩混耳亦無可疑者也東坡扁舟渡江適吳越句趙氏注越字曰此字不可輕用平聲蓋仄韻七古上句尾可仄平韻七古上句尾若用平聲則不諧杜公昔隨劉氏定長安問之不肯道姓名究竟變格非法亦無可疑者也李賀衰蕙愁空闌句趙氏注曰第三字不平則律句矣蓋李賀此詩參用齊梁不盡合調唯此句得法故趙氏特注此句以明之亦無可疑者也太白悅驚起而長嗟失向來之煙霞句趙氏注曰此四句皆六言若非下句用三平則失調蓋不惟恐與賦類仍爲音節較響耳亦無可疑者也杜詩屢貌尋常行路人趙氏注行字云平最要緊蓋七言第七字平第五字必平乃爲平調而屢貌句又必得行字平聲乃非律

句故云最要緊也亦無可疑者也李義山相與煊赫流淳
熙句趙氏注赫字曰此字必仄蓋下面三平此處亦平則
音不諧如封狼生羆羆生羆七字平聲轉覺其諧而一赫
字易平聲則不諧者以字之平仄相襍故也韓詩快劍斫
斷生蛟鼉杲杲寒日生於東皆用此義不可枚舉獨陸渾
山火詩風怒不休何軒軒命黑螭偵焚其元溺厥邑囚之
崑崙不然故趙氏謂止可用於柏梁體尋常七古斷不可
用蓋柏梁句句用韻自相諧應他詩不爾慮不諧矣亦無
可疑者也趙氏謂平平平平仄平平句於轉韻中不宜蓋
轉韻最喜流美此等非古非律之句殊覺齜牙故不合用
亦無可疑者也以上八則趙氏所謂古詩一定之平仄義
例皆確不可易僭疏其意如此亦未知當否也若其不必

一定者趙氏既未特下重筆此在後人之變通以合天然之節奏爾然趙氏亦有可疑者如東坡四方水陸無不便句趙氏注云第五字平第六字仄便非律句按此句不字必易平聲方諧若不字不改則陸字必易平聲方諧趙氏止以非律句注之未盡音節之妙也紫金百餅費萬錢按此句誠非律矣究不如水腳一錢爭誰先一半已入薑鹽煎爲不轉韻七古之正調也趙注云卽六字仄獨合末一字平亦可是其啞更盛於坡句彌不入調也若謂七古專用正調恐不能變化參錯相生相應得四方水陸紫金百餅等一二句間之更見挺動卽如此說趙氏亦當注明不得如所注云云也右丞我心素已閒襄陽北山白雲裏趙氏注云皆天然古句按北山白雲裏誠天然入古我心素

已閒不律則有之若謂其爲天然之古則必我素心已閒而後可也此皆僕之所疑於趙氏者也近歙人吳蘇泉紹濛聲調譜較趙氏爲益詳其言一定之平仄亦均不誤惟注老杜征衣颯颯颯字下云此字用仄妙愚按上句連竿動嫋娜已四仄矣此處卽易颯字爲平聲亦未見其不妙也又注高通荆門路荆字云必平愚按荆字卽易仄聲亦是古句今云必平是必宜用四平聲也五古得四平三平句誠佳然亦何其滯也總之此事不可不嚴不可不審吳氏謂不屑章句者奸聲詖律盡裂閑檢墨守者又形模肖而生氣少眞篤論也僕嘗謂漁洋不肯以此譜示人不如秋谷之有遠見秋谷云不知此者固未爲能詩僅無失調而已謂之能詩可乎故輒以語人無隱此三四語較之

吳氏尤曲而盡也然漁洋答劉大勤云無論古律正體拗體皆有天然音節唐宋元諸大家無字不諧明何李邊徐王李亦然袁中郎之流便不了了矣又云七言古凡一韻到底者其法度悉同惟仄韻詩單句末一字可平仄相間用平韻詩單句末一字忌用平聲若換韻者則當別論是漁洋亦未嘗不以聲調示人也特不如趙氏之備耳凡趙氏所致譏於漁洋者甚多其詞氣憤懣非盡由論詩之相失恐自以蹉跌不振由漁洋門下所擠故耶抑以婦舅之親不能出氣力相拔故耶要之聲調一譜趙氏之功爲大近見某先輩有云余少喜爲詩近見某氏詩佳不復爲矣此某先輩好勝之過也詩發乎情婦人孺子皆可爲之亦皆有天籟何必因見某氏之詩而遽不復爲乎余謂先輩於

詩雖極力爲之決不能遽臻絕頂以平日有好勝之心在也晉宋時競尙詩歌當其時耳目漸染雖不學者亦能出口成章如沈慶之手不知書眼不識字及逼令作詩衆坐稱其辭意之美今讀其詩有先民之質表無後來之華藻然則學詩者貴通其大意聞其風指至於妃配對偶表飾典實抑末矣慶之詩云微命實多幸得逢時運昌朽老筋力盡徒步還南岡辭榮此聖世何媿張子房

外舅閩縣周蒼士先生

嘉璧

晉和山行雜詩云轎中竟日渾

無事閒揭疎簾看遠山按轎字入詩始於宋時而詩家罕用此字楊誠齋獨喜用之如行到深邨麥更深放低小轎過桑陰詩卷且留燈下看轎中只好看春光總將枝上雨聽入轎間衣曉過新橋啓轎牕要看春水弄春光行到笛

橋中半處鍾山飛入轎，臆離暖轎行春底。見春遮欄春色不教親，急呼青繖小涼轎。又被春光著莫人。

建甯張亨甫詩五言古如畢節高氏篇三里灘雨中游天平山張家渡贛州西母大庾嶺過清遠峽羚羊峽羚羊山寺浴日亭遊頂湖山七星巖等篇七言古如讀古山先生詩感賦燕文貴溪山雪霽圖平遠臺風雪入關圖等篇篇法渾成字字沈著幾於樹高岑王李之幟奪虞楊范揭之席矣亨甫未刊詩更有京伶某郎曲語語寫入自己身分詩情縹緲直欲化筆墨爲煙雲矣其雨中游天平山云

絳庭借其從兒

順之天平對支硎，嶠嶠立萬石。秋氣養孤清，雨聲在寒碧。登高見吳甸，渺然大湖夕。天長獨鳥盡，野曠歸雲隔。山河杳無人，下有太古迹。風泉結幽籟，淒清滿空隙。目齊遠近

理興與邱壑適不知葉落多哀蛩響如惜寺僧正閉門淪

茗訝來客荒厓霧露深何以迴行策張家渡云

文信國故里

煌

煌歐陽文磊磊信國節山川鬱神秀並代兩人傑我來訪
故里落日莽蟠嶼煙巒遠際天水波浩流雪悲風起曠野
慷慨思遺烈在昔南宋衰俄頃半壁裂四鎮謀不庸孤忠
力徒竭艱難奮義旅崎嶇出閩粵天亡事已非人存國未
絕哀歌凜正氣獄中肝肺熱荒臺痛朱鳥胡沙照碧血陵
谷有煙頽斯人豈磨滅轉憶年少時曲謹非所屑至今論
已定何媿平津列嗟茲當世賢相士母乃劣承平獎庸鄙
倉卒誰奮發古來英雄姿豪宕自天骨未遇或脫略致身
必勇決司勳絀大用迺以傷春卒始思牛奇章泣下揚州
月十九日游頂湖山得詩四首云谿迴萬石深蕭蕭蔭喬

木幽亭隱谷口下見澄潭曲夕陽古不到千年閱寒綠獨

坐聽山風棲禽語相續半山亭入山不見山絕壑奔流響萬

木氣成雲葉落無人往鐘聲隨上方天光見一掌坐憩石

華秋高深寄俯仰補山亭蒼蒼轉陰崖寂寂闕嘉樹客行人

樛花白雲共來去山風弄幽泉落日不知處但聞經聲希

蕭寥巖壑暮慶雲寺沿澗尋靈源孤亭企飛雪蒼茫萬古氣

一洗空山骨寒碧滙潭光餘青滿林樾石壁多悲風夕陽

浩明滅飛水巖讀古山先生詩感賦云祝融抱日升扶桑虛

堂爽氣來八荒風吹萬竅互鏜鞳七絃一撫天蒼涼先生

少年自學道自謂於詩非所長勸人學詩學子美墨汁欲

洗民瘼瘡靜觀造化得深悟往往韋杜森相當岱宗秋色

冠東海岷峨屨注開滄江空山野水忽暮雲桃花乳燕交

春塘先生老懷最寬厚每聞大政意慨慷忠肝義膽無所

放精誠著紙如星光開陳大易孔孟訓勸我不僅爲詞章

先生深於易著讀易槧疑安得赤手翻銀潢招先生魂騎鳳凰歸來歸

來洋溪先生居里陽風雪入關圖爲吳石華教諭題云君言由大同入

關太行萬峯莽向北雲中列塞慘無極驚風驅雪雁不飛

匹馬西來走邊色居庸遠接長城昏金元故壘徒紛紛及

關回首望岱朔武靈骨朽燕荒墳此皆英雄百戰地戍樓

捲蓬煙倒翳北平不見飛將材廣武悲來阮籍涕層崖岌

業錯九陘草木凍割太古青勢馳浩洶石陸裂寒出黯淡

雲先冥輪摧蹄折過者幾侯騎無聲鼓角死蒼黃大野晝

飛沙浩白長空氣懸水燕臺酒徒慷慨歌貴家羊羔驕翠

蛾豈知書生一雄劍仰天欲鏖山嵯峨棄襦不滿豪奴笑

路入中原且孤嘯迴看遼海寒層冰誰拓幽州且斜照當
時磊砢英多人乃使飄泊關山塵卽今嶺外坐愁歎何止
早潦千家貧著書漫與消寂寞歲晚天寒風雨作我方獨
過橫浦關相思如雪棊花落

蔚州魏環谿先生云古人有一二小節傳爲美談者如濂溪
之蓮淵明之菊太白之月浩然之梅元章之石叔子之碑
伯牙之琴子陵之裘孟嘉之帽林宗之中以及諸葛之菜
之類非物重人人重物耳聞縣葉句卿解元修昌云我愛
頭銜名士習元章袖石浩然梅卽此意也

先大人名高漢字卿雲

晚生陳慶鏞填諱

以家計故棄舉子業援例

入成均浮海遠遊海南江北河東淮西皆其往來熟習之
地生平遇怪者三遇鬼者四遇虎遇蛇者各兩皆不能犯

有不測事鬼神每先來告性至孝大父老病困床席間先大人往禱浙之南海觀音巖往返三千餘里及到南海先大父卽於是日夢觀世音以柳枝水灑其面病垂愈又與兩叔父友愛生平深慕趙清獻於每日所爲之事必晨夕焚香告天彌留之日有異香繞室俄而去世

時年七十三

老人

李晴川先生

作霖

爲先大人之故交嘗謂昌彝曰爾尊大

人有三難孝友著於家一難也生平不履邪徑二難也五十年晨夕焚香告天家居旅次無間寒暑三難也同里丁階庭副郎捐贈詩云孝心今見蕭希逸厚德人懷陳太邱副郎父慕九先生古君子也與先大人爲摯交云

益陽湯海秋先生

鵬

著有海秋詩集二十四卷先生詩筆豪

放氣欲籠罩宇宙其於詩凡三百篇離騷漢魏六朝三唐

無不形規而神絜之先生年二十登道光三年進士始官禮部主事既兼軍機章京遂補戶部主事轉貴州員外郎擢山東道監察御史年始三十餘意氣益蹈厲謂天下事無不可爲者其議論所許可惟李文饒張江陵輩徒爲詞章無當也既得御史則勇言事未踰月三上章最後以宗室尙書斥辱滿司官事非政體言過當且在奉 旨處分後罷御史回戶部員外郎轉四川郎中是時暎夷擾海疆求通市君已黜不得言事猶條上尙書轉奏夷務善後者三十事雖報聞而後彌利堅求改關市約有奏中不可許者數事人以是服其精非疏闊大略者也詩五七古多長篇鉅製或一百八十首或數千言偶見佳篇輒思並之先生才足以橫掃一世而詩格亦因此漸減五言佳句如菰

蘆一片月江海百年心天涯萬里眼人事九迴腸秋色橫
詩舫蘆花隱釣磯山勢盤天地河聲送古今白雲依水盡
黃葉補林虛河漢澄如許梧桐微有聲乾坤萬里客風雨
九秋臺雨生空際綠雲向斷中黃風吹殘夢去鳥喚好雲
生虹蜺生澗紫鶴鶴下天青亂雲欹幔黑急雪落簷高地
僻客難到雲深門自關柳縈彭澤夢桃醉武陵霞天遠江
湖曰人奇幕府疏戶斜蟲搗月天闊雁橫秋苔深無鳥過
僧老有雲知橋危依老樹亭古受輕風風霜蓬鬢短楊柳
蘄門愁萼鱸隨野艇雞犬滿巖扉杜陵詩是史王積醉爲
鄉劍吹關寒霧衣雜海山雲衣上風霜白愁邊天地青新
情閒處活舊事醉中深地偏花徑合天闌寺門低暮雨梧
桐老秋聲蟋蟀多才名雙鬢雪杯酒百年春七言佳句如

才能受謗有餘福詩不閉門無苦心月色古今如此白秋
聲天地不禁寒天地無言自風雨古今未了此文章月缺
月圓此河漢花開花落自塵埃空隨明月一時到不識白
雲何處尋西山如幕邊雲紫古刹無人木葉黃一代衣冠
先士氣百年天地入詩騷樓臺缺處數峯見霜雪封時一
徑微天地有情還故我秋冬無事足新詩才名未老乾坤
大詩句非狂風雨疑十年涕淚頻佳節萬里江湖有故鄉
四塞河山千鳥外萬家風雨一秋聲三年詩社交天下一
夜鄉心過嶺南濤飛瀚海旌旗濕日落天山兵甲黃盛世
文章此春氣少年天地獨秋風歲暮風霜雙鬢禿天涯兄
弟百杯深屋曲幔藏新雪色墨寒詩帶晚風聲碧鳩暮雨
呼朝雨黃犢前岡趁後岡欲醒欲眠春鳥過忽晴忽雨桃

花開花枝照眼能娛我世路憐才卻畏人風如有意低楊
柳水不能波長菱荷數聲幽鳥是非外一片涼風醉醒間
百年來往漁樵夢一劍浮沈歲月秋波承枯藻魚皆立露
點衰楊鴉未黃本以春風爲杖履未妨秋色滿衣裳歷歷
鳧鷖秋影活深深臺榭夕陽留千柄萬柄白菡萏一聲兩
聲黃栗留風颯雨點攪花點春在山頭更水頭巖壑有無
餘落日陰陽闔闢在蒼煙登桃花峪遠紅侵屐莎草泉幽
綠滿襟山雜古今千點石海浮天地一痕煙雲泉供養何
曾老釣弋交游不用媒山中種樹能調性野外論詩不費
錢秋雨娟娟蘇病骨春風浩浩寄愁心我卜黃花饒晚節
人方意故謗明珠眼看天下無窮事口誦人間未見書詩
名未足匡天下野性何知傍斗魁天上風霜吹汲黯人間

鐘鼎薄匡衡曲沼芙蓉千點露小樓楊柳萬枝霜秋風萬
里羅浮夢暮雨千尋滄海波白酒似狂還似聖黃花非色
亦非空陶潛醒醉非關酒杜甫行藏只倚樓百年生計杯
中物萬里離情野外樓雨含碧澗波千點風送黃昏花一
樓杖底雲霞扶野客杯中天地寄茅樓山中那見東西虎
溪上閑眠子母牛白石長撐橋下水青天自傍竹間樓乾
坤歌哭雙鳴鳥身世浮沈一葉舟滄海潮聲爲汝大太行
山色替人愁答葉松
匪孝廉九月天風吹木葉百年人事餞秋光
海秋平日待友以誠與余友善披肝瀝膽出於至性讀其
詩不勝有今昔之感

閩縣何道甫孝廉

則賢

著有藍水書塾詩草四卷詩格辦香

楊誠齋樸質無蔬荀氣其佳篇如擬白樂天新製布裘謁

梨嶺唐建州廟四月十二夜枕上口占田家雜詩讀唐陸
宣公奏議諸篇皆合律其擬白樂天新製布裘云惡寒而
輟冬造化無是理朔風一怒號萬物爲披靡扶纊廣廈間
縈懷幽谷裏嗟彼伶俜人短褐至胷耳冰雪蘊重陰瑟縮
復誰似布濩大地春道從務本始奢麗戒必嚴蠶績無時
已吉貝與桑麻種植徧遠邇斯事力以行獲益應倍蓰何
若萬里裘虛願徒爾爾和元許文正偶成詩韻云屈指年
華四十三鄉人未免笑何堪迂拘自村機心少樸拙還教
世味諳無可締歡唯卷軸時縈夢想有煙嵐一編習靜頗
遮眼侵曉簷聲覺雨甘書徐虹亭詞苑叢譚後括道園仲
舉詞意偶作云簾幙重重怯晚寒憶傳宮燭直金鑾夕陽
西下嚴城月欲喚繁華夢起難書佳兒所記功過格云會

三顏四我師資能否清宵念百非莫易言功嚴記過芸窗
下筆有天知道甫博涉羣籍藏書幾二萬卷其於史學用
力尤深其文集八卷嘗問序于余所著書如讀經札記晉
史補略球使禮服答問涉史漫筆史通何氏偶箋 昭代
碑傳表誌文輯名人軼事隨錄東越著述所見錄東越歷
朝文輯 皇朝東越文輯藍水書塾叢筆各若干卷

男慶焯辭